

«ԳՐԱՌԱՋՔՆԵՐԸ» ՀԱՅ ՄԻՋՆԱԴԱՐՅԱՆ ՄԱՏՆԱԳՐՈՒԹՅԱՆ ԽԵՋ

Ա. Գ. ԴՈԼՈՒԽԱՆՅԱՆ

Միջնադարյան ձեռագրերում, հատկապես ժողովածուներում հաճախ ենք հանդիպում յուրատեսակ ստեղծագործությունների, որոնք կոչվում են գրառաջք: Դրանք փոքրիկ գեղարվեստական միավորներ են և երևան են գալիս փնջերով: Տարբեր ձեռագրերում այդ փնջերը տարբեր միավորներից են բաղկացած, շնայած երբեմն կրկնում են միմյանց կամ մատնում իրենց մի ընդհանուր ակունքից սերած լինելը:

Գրառաջքները նամակների, թղթերի, կոնդակների, հրովարտականների և նման այլ գրագրությունների պերճապաճույճ նախաբան-սկսվածքներ են. ըստ որում, դրանք քաղված են ոչ թե կոնկրետ ստեղծագործություններից, այլ ստեղծված են նման գործերին նախորդելու համար: Այդ պատճառով էլ որոշ ձեռագրերում գրառաջքները կոչվում են «օրինակք», «ձևք», «գովասանութիւնք» կամ «նախերգանք»: Իշխում է, սակայն, «գրառաջք», որն անհամեմատ ավելի է համապատասխանում քննվող միավորների էությունը: Ինքնին հասկանալի է, որ գրառաջքային փնջեր ստեղծող հեղինակները, դրանք ընդօրինակող ու մշակող գրիչները, պատվիրատու կամ կազմող գրասենյակները օգտվել են ոչ միայն հին ու նոր գրառաջքներից, այլև այդպիսի սկսվածք ունեցող պատրաստի գործերից, բայց կտրելով նրանցից և անորոշ ձևի մեջ դնելով այդ հատվածները: Այսուհանդերձ, գրառաջքների մեջ կոնկրետ նամակի, կոնդակի և նման այլ գրվածքի փաստաթղթային արժեք որոնելը անիմաստ կլիներ:

Որպեսզի գրառաջքների օգտագործման ժամանակ շփոթություն չառաջանա, դրանց ստեղծողները հասցեատերերի անունների փոխարեն օգտագործել են պայմանական դարձվածքներ («այս անուն», «ով որ է» և այլն): Օգտվողը պարտավոր է այդ պայմանական դարձվածքների տեղը դնել համապատասխան անուն: Երբեմն գրառաջքներում հանդիպում են հատուկ անուններ, կոնկրետ թվացող դեպքեր, որոնք բոլորն էլ, սակայն, պայմանական նշանակություն ունեն:

Գրառաջքների ծավալը փոքր է՝ մի քանի տողից—մի քանի էջ: Վերջիններս փաստորեն շեղումներ են՝ գերաճած առանձին ու ամբողջական գովքերի:

Որպես կանոն գրառաջքները դրվում են մի ընդհանուր խորագրի տակ («Գրառաջք», «Առաջք թղթոց» և այլն), ապա ենթախորագրերով միմյանց են հաջորդում համապատասխան անձանց (կաթողիկոսի, թագավորի, ոսկերչի, գրոց աշակերտի, կտրիճի և այլն) ուղղված դրվատանք-ներբողանքները:

Գրառաջքները դեռևս լայն քննության առարկա չեն դարձել: Նրանց մասին կցկտուր նշումներ կան լոկ ձեռագրացուցակներում կամ առանձին ձեռագրերի նկարագրությունների մեջ: Այսպես, օրինակ, Մաշտոցի անվան Մատենադարանի ձեռագրերի երկհատոր ցուցակում «Նամականի» խորագրի տակ նշված են այն ձեռագրերի համարները, որոնց մեջ կան «գրառաջք, նախերգանք.

սրինակը նամակաց և գրութեանց»¹։ Նկատենք, որ ձեռագրացուցականներում էլ միշտ չէ, որ նկարագրված կամ նշված են գրառաջները։ Առհասարակ բնավ ուսումնասիրված չլինելու պատճառով է, որ հայոց լեզվի ու գրականագիտական բառարաններում բացակայում է գրառաջ բառը²։

Ընդ հայտնի հնագույն գրառաջները երևան են գալիս XIII դ. ձեռագրերում։ Անհավանական չէ, որ այդպիսիք եղած լինեին նաև նախորդ դարերում։ Այդ յասին անուղղակիորեն վկայում են Ներսես Շնորհալու «Թուղթ ընդհանրական»³, Գրիգոր Մագիստրոսի թղթերն ու նամակները՝ գրված XI դ.⁴, «Գիրք թղթոց» ժողովածուն⁵ և, վերջապես, առանձին պատմիչների երկերում հիշատակված գրագրությունները։ Նրանց նախնական արմատներն ավելի խորն են։

Անվանի ուրարտագետ Մելիթիշվիլին քննելով ուրարտական արձանագրությունները, հանգել է հետևյալ եզրակացության. «В урартских победных надписях можно различить начало, центральную часть и конец надписи»⁶։ Կանգ առնելով սկզբի մասի վրա, նա գտնում է, որ այն նվիրված է աստծուն և ունի դրվատական բովանդակություն⁷։ Այդ դրվատական-ներբողական ողին է, ահա, որ համապատասխան փոփոխություններով հանդերձ պահպանվում է նաև հետագայում։ Նախաքրիստոնեական ժամանակների փաստերից կարելի է հիշել Մովսես Խորենացու Պատմության մեջ պահպանված Վաղարշակ թագավորի թղթի սկիզբը՝ ուղղված պարսից թագավոր Արշակ Մեծին. «Արշակ թագավոր երկրի ու ծովու, որոյ անձն և պատկեր-որպէս և է իսկ մեր աստուածոց, իսկ բախտ և պատահումն ի վեր քան զամենայն թագավորաց, և մտաց լայնութիւն՝ որչափ երկնի ի վերայ երկրի. Վաղարշակ կրտսեր եղբայր քո և նիզակակից, որ ի քէն կարգեալ արքայ Հայոց. Ողջ լեր ամենայն յաղթութեամբ»⁸։

Ինչպես տեսնում ենք, «թե՛ ուրարտական և թե՛ հետուրարտական նախամեսորոպյան այս գրությունների նախադրություններում իշխում է փառաբանական-գովասանական մի հատուկ ձև, որի արձագանքները հասնում են մեզ հետաքրքրող գրառաջներին։ Եվ դա բնական է, որովհետև գրառաջը, որպես պատշաճ եղանակով խոսքն սկսելու ձև, չէր կարող ծնվել լուկ X—XIV դդ.։

Գրառաջները, որպես կանոն, ներկայանում են առանց հեղինակների։ Իրականում, սակայն, դրանք բոլորն էլ ճանաչված հեղինակների գրչի արգասիք են։ Բարեբախտաբար դրանցից մի քանիսի մասին որոշ տվյալներ կան։ Մեզ հայտնի առաջին հեղինակը, որի անունով գրառաջներ են հասել, XIII դ. բանաստեղծ Հովհաննես Երզնկացին է։ Մաշտոցի անվան Մատենադարանի № 652 ձեռագրում պահպանվել են նրա գրառաջներից երկուսը՝

¹ «Ցուցակ ձեռագրաց Մաշտոցի անվան Մատենադարանի», Ա. Երևան, 1965, էջ 1402, Բ, 1970. էջ 1193։

² Գրառաջը՝ բարդ բառ է՝ բաղկացած գիր (գրվածք, գրություն) և առաջ (առաջը) բառերից, ուր նկատի է առնված տվյալ թղթի, գրվածքի, գրության առաջի (սկզբի) հատուկ մասը՝ «առաջը», «նախնորգանքը»։

³ Ն. Շնորհալու, Թուղթ ընդհանրական, էջմիածին, 1865։

⁴ «Գրիգոր Մագիստրոսի թղթերը», Ալեքսանդրապոլ, 1910։

⁵ «Գիրք թղթոց», Թիֆլիս, 1901։

⁶ Г. А. Мелликишвили, Урартские клинообразные надписи, М., 1960, стр. 94։

⁷ Նույն տեղում, էջ 93—102։

⁸ «Մովսիսի Խորենացու Պատմություն հայոց», Տիֆլիս, 1913, էջ 29։

«Ազդմունք նորին Յոհաննու Ըզնկեցոյ առաջեալ է»⁹ ընդհանուր խոբագրով, որին հաջորդում են այդ գրառաջները.

ա) «Գովասանութիւն եպիսկոպոսաց և կաթողիկոսաց, յորժամ գրէն թուղա ղրկելոյ՝ յառաջ զայս գրեն, ապա զծանուց [մունսն]»¹⁰,

բ) «Գովասանութիւն եպիսկոպոսաց, իշխանաց և աշխարհականաց»¹¹,

Այստեղ, ինչպես տեսնում ենք, «գրառաջք» բառը չկա, սակայն մեջբերված խորագրերը ցույց են տալիս դրանց գրառաջային բնույթը, ուր որոշակի ասված է. «յառաջ զայս գրեն» («գովասանութիւնը»):

Ինչպիսի ամբողջութիւն է կաղմել Հովհաննես Երզնկացու գրառաջների շարքը, դժվարանում ենք ասել, սակայն հիմքեր կան մտածելու, որ մեզ հայտնի այս օրինակները փշրանքներ են նրա ստեղծած գրառաջներից: Այս առիթով ուշագրավ է հետևյալ փաստը: Բանասերներ Ա. Սրապյանը և է. Բաղդասարյանը վերջերս քննության առարկա դարձրին Հ. Երզնկացու մի թուղթը և առընթեր տպագրեցին մի հատված № 3439 ձեռագրից¹², ուր առկա է «այս անուն» բանաձևը. «Մանուցանեմ քեզ ղաստուածասեր հոգի այս անուն խոհեմամիտ և առաքինասեր վարդապետիդ...»¹³, Հարց է առաջանում՝ արդյոք այստեղ գործ չունենք նույն հեղինակի մի այլ գրառաջի օգտագործման փաստի հետ. չէ՞ որ նամակում հասցեատերը չէր կարող անհայտ լինել և նշվել «այս անուն» բանաձևով:

Գրառաջային շարքերի հեղինակներից է, մեր կարծիքով, նաև XVI դ. բանաստեղծ Հակոբ Թոխատեցին: Դրա վկայությունն է այժմ լեւինգրադի Սալտիկով-Շչեդրինի անվան գրադարանում պահվող № 13 ձեռագիրը (XVIII դ.): Այստեղ գրառաջներից մեկի դիմաց նշված է. «Տէր Յակոբին մինչ ի հոս գրեցի», իսկ մի այլ նշում առում է, թե «Ձգովասանքս արժանաւորաց գրեա և զԲաթուկենց տէր Յակոբն յիշեա»: Հասկանալի է, որ XVIII դ. գրչի ձեռքի տակ եղել են նաև Հակոբ Թոխատեցու գրառաջները:

Ուշագրավ է XVIII դ. գործիչ ու բանաստեղծ Պաղտատար Դպրի 1752 թ. հրատարակված «Բարեկամիքը»: Այստեղ նամակների ամբողջական ձևեր են՝ գրառաջներով հանդերձ: Առանձին կարևորություն ունի «Առ ազդեցութիւն ինչ առ ի կիր ածող սիրելիսդ զօրինակս բարեկամացս»¹⁴ խորագրով բացատրությունը, ուր հեղինակը նկատել է տալիս, որ դրանք միայն իր ստեղծած ձևերը չեն, այլ՝ «առեալ զոմանս ի նախնեացն շարադրութեանց և զոմանս որքան երբեք կարն ամենակար՝ ի կարն մեր տկար»: Այս «ազդեցութեան» (իմա՝ ազգի) վերջին մասը ևս գրառաջների մի փոքրիկ շարք է:

Գրառաջների ամենակարևոր առանձնահատկությունն այն է, որ դրանք հասցեագրված են տարբեր դիրք ու դեր ունեցող անձանց, ուստի և յուրովի բացահայտում են նրանց կյանքի, կենցաղի ու միջավայրի մանրամասները:

9 Ձեռ. № 652, Թ. 75բ: Այս փաստը նկատել է Ա. Սրապյանը. տե՛ս նրա «Հովհաննես Երզնկացի», Երևան, 1958, էջ 288, 291:

10 Նույն տեղում, Թ. 75բ—76բ:

11 Նույն տեղում, Թ. 76բ—77բ:

12 «Բանբեր Մատենադարանի», № 10, Երևան, 1971, էջ 303:

13 Նույն տեղում: Այդ թղթի վերջին էջի փոխաբերական համեմատությունները մեզ մտածել են տալիս նրա և № 7703 ձեռագրի 106ա—109բ թերթում գտնվող այն խրատականի հեղինակների առնչության մասին, որի նպատակն է օգնել գրառաջների ստեղծելու գործին:

14 Պ ա ղ տ ա ս ար Դ պ ի ր, Օրինակք Բարեկամաց, Կ. Պոլիս, 1752, էջ 98—106:

Որպես ընդհանուր օրենք, գրառաջները նկատի ունեն թագավորներին, իշխաններին, տանուտերերին, զորականներին, կաթողիկոսներին, եպիսկոպոսներին, վարդապետներին, հոգևորականության ստորին խավերին, ինչպես նաև արհեստավորներին, երևելի տիկնանց, առանձին անհատների, անգամ նորապսակներին, ըմբիշներին և այլոց: Թեև մեծարանքի ընդհանուր գնահատանքներով և դրվատանքի սրտագրավ զեղումներով, բայց և այնպես տվյալ անձնավորությանը պատշաճող բնութագրականներով են հորինված գրառաջները: Ընդհանուր գովքն ու դրվատանքը պիտի համապատասխանի տվյալ անհատի դիրքին ու բնավորությանը: Այս առումով ուշագրավ է Պաղտասար Դպրի խրատականը՝ նամակաձևերից օգտվողներին. «... Որ ոք և իցէ, որ կամիցի բարեագիր գրել միում ումեք, հարկավոր է նմա ճանաչել զկացութիւն այնր անձին և այնպէս գրել՝ որպէս նմա վայել է: Զի եթէ այնպիսի բարձր գովութիւն տացէ ումեք, որ չիցէ վայելուչ նմա բնաւ, յոյժ անպատկան լինի դրեալն: Վասն այսորիկ պարտ է նըկատել, թէ որպիսի ոք է անձն այն և այնպէս ըստ պատշաճին գրել զբանն: Այսինքն՝ եթէ իմաստուն կարդացող է, եթէ ճոռոմ ատենաբան քարոզիչ է, եթէ վանաշէն և մարդաշահ է, եթէ հեղաբարոյ և խոնարհ է... եթէ համբաւունակ արհեստագործ է, եթէ համեղաձայն քաղցր երաժիշտ է...»¹⁵ և այլն:

Ձեռագրերում երբեմն հանդիպում ենք նաև զեղարվեստական հարդարանքին վերաբերող խորհուրդներին: Հետաքրքրական է, օրինակ, № 7703 ձեռագրի անանուն ուսուցողականը. «Արդ եթէ կամիս հասու լինել վարդապետական շնորհաց և գովութեան ամենայն իրաց և գովասանական ներդրական բանից, կալ զքեզ օրինակ զչորս տարերքս, զերկինս և զերկիր, զծով և զցամաք և զամենայն որ ի նոսա: Նախ զերկինս և ապա զհողն, յետոյ դժարն և ապա ըզփայտն... Երկնի օրինակ՝ երկիրս և աստուծոյ օրինակ՝ մարդիկք բարեգործք, բարեպաշտ թագաւորք և աստուածասէր իշխանք, լերանց օրինակ՝ նահապետք և մարգարէք, բլրոց՝ վարդապետք, ազբերաց՝ քահանայք, հովտաց, ծառոց և պտղոց՝ արդարագործութիւնք մարդկան ազգաց, զարնանայնոյ և ամարայնոյ օրինակ՝ տղայութիւն, աշնանայնոյ և ձմեռայնոյ՝ ծերութիւն և մահ»¹⁶:

Ասվածից ինքնին հասկանալի է, որ այս եղանակով դրվատվելու էին ոչ միայն գործիչներն ու պաշտոնյաները, այլև նրանց հետ համեմատվող ուժերն ու երևույթները, կյանքը, իրական աշխարհը: Այստեղ անհնար է բերել գրառաջներում հանդիպող բոլոր հասցեատերերի վերաբերյալ օրինակներ, ուստի կբավարարվենք առանձին նմուշներով:

Ահա մի ամփոփ գրառաջ, ուր նկատի է առնված ժամանակի գրագետներից փիլիսոփան. «Աստուածային ձեռքն օծեալ և նորին իմաստութեամբ լցեալ երգարան ամենահանճար հոգոյն, քաղցրաբարբառ և բարէհամբաւ, քաղցր յիշումն մտաց իմոց սիրելի եղբայր և տէր այս [աւետն], ով ոք է»¹⁷: Այս նախաբանին է, որ պետք է հաջորդեր նրանից օգտվողի բուն ասելիքը: Նամակ կամ գրութիւն գրողն, անշուշտ, իրավունք ունի այդ բանաձևի մեջ որոշ փոփոխութիւններ մտցնել: Այս առումով դիպուկ դիտողության ենք հանդիպում Պաղտասար Դպրի խորհուրդներում. «Եւ երբ աստ եղեալ օրինա-

¹⁵ Նույն տեղում, էջ 228:

¹⁶ Ձեռ. № 7703, Թ. 106ա—109բ:

¹⁷ Ձեռ. № 1869, Թ. 278ա:

կաց ըզմէկն կամիցիս, թէ գրես մէկի մի, և գացի ի մէջն մէկ, երկու բառ, որ չիցէ պատկան այն անձինն, պիտի որ չի գրես զայն, զի որպէս և կամիս՝ կարես հաւաքել յայլ օրինակացն կամ ի քո մտացդ զպատկան այնր անձինն»¹⁸:

Բերենք իշխանի հասցեագրված մի դրառաչք. «Քրիստոսապսակ՝ և մեծաշութ, բարեպաշտ և բարեկրօն, բարգուաճեալ յամենայնի, անուն հռչակաւոր և իշխան փառաւոր, աստուծով մեծացեալ և տէրամբ զորացեալ, պարծանք պարծանաց և պայծառութիւն քրիստոնէից, ո՛վ ցանկալի և սիրեցեալ յաշս ամենեցունց այս անուն իշխան և թագաւորազն և ազնուական, լուսատիպ և լուսազարդ, ծաղիկ և զարդ գարնանային՝ նոր բողբոջեալ յոստըս խաչին, պտղով լցեալ աստուածային, ո՛վ ցանկալի որդեակ այս անուն»¹⁹:

Մեզ հայտնի գրառաչքների մեջ կան նաև չափածո ստեղծագործութիւններ: Այդպիսին է, օրինակ, XIV դ. գրիչ Տերտեր Երևանցու ընդօրինակած հետևյալ նմուշը՝ ուղղված քահանային.

Հոգեհանճար եղբայր պանծալի
Եւ վաճառական գանձին գովելի,
Զորս տարեալ ունիս հոգոյդ սէնէկի
Սեւեռագոյն բանիւ հրաշալի,
Սաղմոս երգող անդադրելի
Եւ գրակարդաց հոգով ի լի,
Աշտարակ ի բարձրի
Եւ սպասաւոր յեկեղեցի,
Հրամանակատար Քրիստոսի
Եւ ձեր նմանեացն պարծանք,
Ով որ լինի²⁰:

Նույն ձեռագրից ահա մի ուրիշ օրինակ՝ ուղղված «Պարոնի և հեծելաւորի».

Արմատ կենաց զարմի յազատաց,
Գովէլ զմիւր ի զաւրականաց,
Ահեղ յաղթող ի յամբարըշտաց,
Առիծաձև ի պարբս բազմաց,
Հսկայաձև ի մէնամարտաց
Եւ անդրդուելի հաւատ գերազանց,
Ով որ լինի²¹:

Գրառաչքներ են նախատեսվել բնակավայրերի, քաղաքների համար: Ձ 745 ձեռագրում նման հասցեով գրողներին խորհուրդ է տրվել իրենց խոսքն սկսել այսպես. «Այլև զհոյակապ և զհռչակաւոր քաղաքս, և զանեղաշէն և զաստուածախնամ գեղաւանս աստուծոյ տեառն և քրիստոսադաւան և զաշխատասէր ուսմիկ ժողովուրդ ի սմա...» և այլն²²:

¹⁸ Պ ա ղ տ ա ս ա Ր Դ պ ի Ր, Եշվ. աշխ., էջ 228.

¹⁹ Ձեռ. Ձ 1869, ք. 285ա:

²⁰ Ձեռ. Ձ 8030, ք. 423ա:

²¹ Նույն տեղում, ք. 424ա:

²² Ձեռ. Ձ 745, ք. 150ր:

Հատուկ ուշադրության են արժանի արհեստավորների համար գրված գրառաջները: Ահա մի հատված «լաւ ոսկերիչի» համար նախատեսված գրառաջներից.

... Ով պարոն ոսկերիչ խոճայ,
 Եօթնարփեան շնորհօք լի,
 Արուեստն քո գովելի,
 Որ կա ի մէջ աշխարհի.
 Դու ոսկերիչ աննման
 Եւ ամենայնոց պիտանի.
 Առնես գու գործ զանազան՝
 Շինուած ոսկոյ ՚ւ արծաթի.
 Շինես ըսկի պատուական,
 Յոր և Քրիստոս պատարագի.
 Եւ յօրինես մաղրզման,
 Որ է սուրբ հացին տեղի.
 Շինես գու խաչ հրաշագան,
 Որ է նշան Քրիստոսի.
 Կոստղես սուրբ աւետարան,
 Որ է հրամանք Քրիստոսի.
 Շինես գու բուրվառ արծաթի՝
 Տեղ անուշահոտ խնդի...²³

Վաճառականությանը և շուկային վերաբերող գրառաջներից արժեքավոր է հետևյալ նմուշը.

Պարոն ով դու խոճայ Ասար,
 Քաջ Իմաստուն և խիստ ճարտար,
 Սողոմոնի նմանեցար,
 Խելօք առատ որպէս զնիկար.
 Զինչ որ յերկրի ստեղծուած որ կայր՝
 Դու ճանաչես զլաւն և զվատթար,
 Ամեն բանի ես գու սմսար,
 Զկա յերկրի քեղ հաւասար.
 Զինչ որ բերեն իրք մի վաճառ,
 Գին կու դնես նոցա յարմար...²⁴

Պակաս ուշագրավ չէ «հաքիմի» (բժշկի) համար նախատեսված հետևյալ գրառաջը.

Այս անուն հաքիմ աղգէս հայոց
 Ընտրեալ ի բարի յարմատոց...
 Քրիստոս՝ բժիշկն ամեն ցաւոց
 Տացէ շնորհ ձեռացըդ քոց,

²³ Ձեռ. № 6686, ք. 147բ.

²⁴ Ձեռ. № 695, ք. 43բ.

Ում որ դնես զձեռքդ ի վերայ՝
Առողջասցի յամէն ցաւոց.
Կուրաց տացես զլոյս աշաց,
Խլից շնորհս տաս լսելոց,
Թէ ցաւ անձին և այլի թէ իւրոց՝
Առողջասցին քոյով դեղոց...²⁵:

Բացառիկ արժեք ունեն կանանց, հարսներին հասցեագրված գրառաջքները, որոնցից մեկը այսպես է դրվատում նորահարսին. «Պարծանք ծնողի և ծնունդ և ծովածին մարգարիտ. ոսկէհատ կերտուած՝ յեռեալ ընդ տպագիրոնի և ականց... Ի սոփերային ոսկոյ՝ պսակ պարծանաց և մէհեանդ հրաշայազան՝ ի պատուական քարանց կերտեցեալ, խայծեալ խնծոր ի դրախտէն ադենական՝ սիրեցելոյն ի սենեկի քոյին փեսային... գեղեցիկդ ի դրստեաց և հարս գեղեցկայլալ խէնեղացեալ ընդ սնարս փեսային, որպէս լուսին թերաբացի ի միշոյ քաղէիցն և բազմեանդ պատմուծանաց, դուստր և քուր և հարսն հարսնարանին, զինչ անուն ու լինի»²⁶:

Նման գրառաջքները հնչում են որպես կենցաղային առօրյայի կենդանի արձագանքներ՝ նոր թարմություն հաղորդելով միջնադարյան մատենադրությանը:

Կարևոր է նաև դրառաջքներն առաքողների հարցը. ովքե՞ր էին օգտվելու դրանցից: Անվիճելի է, որ գրառաջքները նկատի ունեն և՛ պաշտոնական, և՛ մասնավոր անձանց: Պաշտոնական կիրառություն պետք է ունենար, օրինակ, քաղաքներին ու ավաններին հասցեագրված գրառաջքը, որից անհատները չէին կարող օգտվել: Միայն աշխարհիկ և հոգևոր տերերը կարող էին առաքել նման գրառաջքով զանազան գրություններ: Թագավորներին, կաթողիկոսներին և այլոց հասցեագրված գրառաջքների ենթադրյալ տերերը նույնպես, հիմնականում, պետք է, որ համապատասխան անձինք ու հաստատությունները լինեին: Այլ են մասնավոր անձանց և հասարակական լայն խավերին նկատի ունեցող գրառաջքները, որոնք զարգանում ու հարստանում են հետագայում:

Գրառաջքները իրենց ստեղծագործական առանձնահատկություններով արձակ ու շափածո փոքրածավալ ներբողներ են: Եվ այս առանձնահատկությունն է, որ հնարավորություն է տալիս դրանք համախմբել ու քննել որպես գրական մի յուրահատուկ տեսակ կամ, եթե կարելի է ասել, ենթաժանր:

Գրառաջքներից յուրաքանչյուրի ուժը, ինչպես նաև տվյալ հեղինակի ստեղծագործական կարողությունը դրսևորվում է ամենից առաջ հաջող բնութագրականների, գեղեցիկ պատկերների, համեմատությունների և բառապաշարի դիպուկությամբ ու պատշաճությամբ: Այդ ճանապարհով էլ, ահա, երբեմն ստեղծվել են այնպիսի գողտրիկ նմուշներ, որոնք է՛լ ավելի ավարտուն ու լիարժեք տեսք ունեն: Նրանց հեղինակները օգտվել են միջնադարյան շափածո լավագույն ստեղծագործություններից և կերտել ուշագրավ գրառաջքաճանապարհություններ:

Այդպիսիների թիվը նույնպես շատ է: Այստեղ, սակայն, կբավարարվենք միայն մեկ նմուշի ընդօրինակությամբ, որը ստեղծված է Գրիգոր Նարեկացու

²⁵ Ձեռ. № 1869, ք. 286ա—բ:

²⁶ Ձեռ. № 6686, ք. 129ա—բ:

«Աչքն ծով ի ծով...» տաղի ազդեցությամբ, նվիրված է «Լաւ կտրիճի» և բնութագրված է «Բան աշխարհիկ և շքնաղագեղ» գնահատականներով: Եթե նարեկացին իր տաղում հանձարեղորեն ղրվատել է աստվածամոր գեղեցկությունը, ապա այս նմուշի հեղինակը, անշուշտ, ոչ նույնպիսի ուժով, բայց ուշագրավ եղանակով փառաբանել է կտրիճ-երիտասարդի մարմնական բարևասնությունները, թարմ շունչ տալով բանաստեղծությանը: Ահա այդ գովք-գրառաջը՝ ամբողջապես.

ԼԱՒ ԿՏՐԻՃԻ
ԲԱՆ ԱՇԽԱՐՀԻԿ ԵՎ ՉՔՆԱՂԱԳԵՂ

Անձն՝ աստուածազարդ, գլուխ՝ գերապանծ և ճակատ՝ լուսայպատ.
Ուներ՝ նրբաւրէն և կից կամարաց պարոյն ճեմ առեալ.
Աչաւք՝ ծով ի ծով և ծիծաղախիտ միշտ ծաւալաւրէն.
Այտիւք՝ շիկորակ շառաւեղօրէն.
Հոբնգամբ՝ ինքնաբոյս, ինքնաշափական, քանակ յարորէն.
Բերան՝ խնկարան, տուփ տիրականին, մուտք մահկանացու
և ելք անմահին,

Շրթունք՝ լար կարմիր, շար բոսորաներկ, շեպիւ շրջայպատ.
Ատամունքն՝ ակատ, յակինդ անբաղդատ, իբր արծաթայպատ,
Մորուք՝ ծիածան, ոսկէթել դեղձան, մանօղանման.
Պերջ պարանոցաւ՝ լուսով պար առեալ, որպէս զառաւօտ,
Լանջք՝ լայնատարած, թիկամբ թեւակիր, յառիւժ համայկալ.
Սիրտ՝ Սարարադեան, հովտաց հանգունակ, հովիտ շուշանի,
Թեք՝ պարայձգական, պարող անդրստին պարթեւականաւ.
Բազուկ՝ գրկայբարձ, բերմամբ ճարպկորեն, ճօճուն ճեմական,
Մատունք՝ մըտաօրէն, մատաղ մուրճացեալ, վառվառ մոմեղէն.
Անձամբ՝ ուռօրէն, սոսիական ելիւ, քեղս առեալ ծալրարձակօրէն.
Հոգոյս հարազատ և աչացս լոյս, ով և որդի (= ով լինի²⁷),
անդրանկան պարուն²⁷:

Ամփոփելով շարադրվածը, կարող ենք ասել, որ իրոք, հայ գրականության աշխարհականացման դարերում կյանքի է կոչվել գրական մի նոր տեսակ կամ ենթածանր՝ գրառաջի անունով: XIII—XVIII դդ. ստեղծվել է այդ գրատեսակի մի հարուստ ժառանգություն, որը մինչև օրս ցրված է սկզբնաղբյուրներում և չի արժանացել բանասերների ուշադրությանը:

Գրառաջների հետազոտությունը ցույց է տալիս, որ դրանք մի նոր ճանապարհ են բացում դեպի հայ միջնադարյան պատմական իրականությունը և հնարավորություն ընձեռում ծանոթանալու տարբեր բնագավառների գործիչների ու հասարակական տարբեր միջավայրերի հետ կապված խնդիրներին: Մենք կարողացանք միայն ընդհանուր տեղեկություններ տալ դրանց մասին՝ հարցի հանգամանալից քննությունը և բնագրերի գիտա-քննական հրատարակությունը թողնելով ապագային:

27 Ձեռ. № 6686, ք. 128բ—129:

«ГРАРАЧКИ» В СРЕДНЕВЕКОВОЙ АРМЯНСКОЙ ЛИТЕРАТУРЕ**А. Г. ДОЛУХАНИЯН****Резюме**

Исследование грарачков (краткое похвальное предисловие к письмам, посланиям и т. д.) показывает, что они открывают новый путь к изучению исторической действительности армянского средневековья и позволяют ознакомиться с деятелями разных сословий. Как письменные памятники, грарачки можно отнести к художественной литературе, в частности, к жанру панегириков.

Большое значение имеет изучение грарачков в общественно-этнографическом аспекте, ибо они свидетельствуют об уровне развития культуры народа в период средневековья.